

Ny Baiboly ho an'ny ankizy
dia manolotra



Ilay tafika
kelin'i
Gideona




Nosoratan'i: Edward Hughes
Sarin'i: Janie Forest; Alastair Platerson
Nampifanarahin'i: Ruth Klassen
Nadikan'i: Fikambanana "Ndao mba hiaraka aminay" na
association "Allons ensemble" FJKM Nazareta Amborovy
Mahajanga Madagascar
Novokarin'i: Bible for Children
www.M1914.org

BFC
PO Box 3
Winnipeg, MB R3C 2G1
Canada

©2022 Bible for Children, Inc.
Azo atao ny fandikana na fakana ity tantara ity
nefa tsy ho amin'ny fitadiavam-bola.





Taorian'ny nahafatesan'i Josoa dia tsy nankato an'Andriamanitra intsony ny vahoakan'Israely ary nanalavitra Azy. Navelan'Andriamanitra nodoran'ny Midiana noho izany ny vokatra sy ny tranon'izy ireo. Hany ka tany amin'ny zohy fierena tany antendrombohitra no nonina ny Israelita.







Namboly varimbazaha an-tsokosoko ny lehilahy Israelita iray. Nafeniny tao ambany hazo lehibe iray, toerana tsy misy mahita, ny vokatra azony tamin'izany. Tsy fantatr'ireo Midiana io toerana io, saingy Andriamanitra kosa mahalala azy! Nandefa anjely Andriamanitra hitondra hafatra ho an'i Gideona.



Tian'Andriamanitra hamotika ny sarin'ilay andriamanitra tsy izy izay tompoin'ny rainy, ary hanorina alitara ho an'Andriamanitra tena Izy i Gideona. Na dia natahotra ny hovonoin'ireo mpiara-belona aminy aza i Gideona, dia nankatoaviny izay nandidian'Andriamanitra taminy.




Naniraka an'i Gideona hitarika ny miaramilan'ny Israely hiady amin'ireo Midiana ratsy fanahy ihany koa Andriamanitra. Natahotra mafy i Gideona noho izany ka nangataka famantarana manokana avy amin'Andriamanitra, famantarana izay mampiseho azy fa tena homba azy tokoa izy.



Nametraka
hoditra ondry
teo amin'ny tany
ary i Gideona.







Ary hoy izy
tamin'Andriamanitra:

"Raha misy ando
eo amin'ny
volon'ondry,
ary ny tany
manodidina
mijanona ho
maina, dia
ho fantatro


fa ny tanako no
hamonjenao ny Israely araka izay
efa voalazanao". Nony maraina inona
tokoa fa maina ny tany, ary NY VOLON'ONDRY
kosa dia LENAN'NY RANO tanteraka!




Mbola nanahy foana ihany anefa Gideona.
Ny handefasan'Andriamanitra ando eo
amin'ny tany indray no tadiaviny, fa
tsy eo amin'ny volon'ondry. Nony
maraina ary ny andro, dia indro fa
lena tokoa ny tany, ary **NY
VOLON'ONDRY** dia **MAINA**
tanteraka!



Ary dia niainga niaraka tamina vatan-dehilahy
32.000 Gideona, saingy nahenan'Andriamanitra ho
300 lahy ihany ireo mba tsy hireharehan'Israely
hoe: "Ny tanako ihany no namonjy ahy".



Hitan'Andriamanitra fa mbola natahotra ihany
i Gideona, ka dia nataony naheno ny resaka
nifanaovan'ireo miaramila Midiana roa lahy
mifampitantara nofy izy. Tao anatin'ilay nofy
dia nisy mofo vary hordea iray nikodiadia
nankeo amin'ny tobin'ny
Midiana ary dia
namotika azy.




Raiki-tahotra ilay mpiambina iray sady nikiaka mafy hoe: "Ny... sabatr'i Gideona!" Ary rehefa ren'i Gideona ny amin'ilay nofy sy ny heviny, dia fantany fa ho avy hitondra fandresena ho azy Andriamanitra.



Nanomana fanafihana iny
alina iny ihany Gideona.
Notolorany anjomara sy
siny foana misy fanilo
avy ny miaramilany, ka
dia nitoby manodidina ny
tobin'ny Midiana izy
rehetra.




Vao nanome famantarana i Gideona, dia nitsoka ny anjomarany avy ny miaramila, namaky ny siny teny an-tanany no sady nandrehitra ny fanilony. Tabataba sy korontana re izao! Natahotra mafy ireo Midiana ka dia lasa nandositra lavitra.



Taorian'io fandresena lehibe io, dia nangataka an'i Gideona hitantana ny fanjakany ny vahoakan'ny Israely. Saingy nanda Gideona. Fantany mantsy fa Andriamnitra irery ihany no manan-jo hitantana ny

fiainan'ny vahoaka.



Ilay tafika kelin'i Gideona

Tantaran'ny Tenin'Andriamanitra, ny Baiboly,


Tao amin'ny bokin'ny

Mpitsara 6-8

"Ny fanambaràn'ny teninao dia manazava."

Salamo 119:130





Tapitra

15



60



Ny tantara ao amin'ny Baiboly dia miresaka amintsika ny amin'Ilay Andriamanitsika mahafinaritra, Izay namorona antsika ary maniry ny hahafantarantsika Azy.

Fantatr'Andriamanitra fa manao zava-dratsy foana isika, izany no antsoiny hoe "fahotana". Fahafatesana no sazy ho antsika noho ny otantsika, saingy tian'Andriamanitra tokoa isika ka nomeny Jesosy Zanany ho faty teo amin'ny hazo fijaliana, mba ho voasazy noho ny helontsika. Avy eo nitsangana tamin'ny maty Jesosy, ary niakatra any an-danitra! Raha mino an'i Jesosy ianao, ary mangataka Aminy mba hamelàny ny helokao, dia havelany tokoa izany! Honina ao aminao Izy, ary ianao honina miaraka Aminy mandrakizay.

Raha te-hibebaka hiala amin'ny fahotanao ianao,
dia izao no afaka lazainao amin'Andriamanitra:

Ry Andriamanitra ô, mino aho fa maty ho ahy Jesosy, ary velona Izy ankehitriny. Miangavy Anao aho, Tompo ô, midira ao amin'ny fiainako, ary mamelà ny heloko, mba hahazoako fiainan-baovao, ary ho avy ny andro handehanako eny Aminao ho mandrakizay. Ampio aho ho velona ao aminao, tahaka ny Zanakao. Amena.

Vakio ny Baiboly ary miresaha amin'Andriamanitra isan'andro!
Jaona 3.16

